

BERITA HARIAN

DATE: 21/09/2007

Warga Belgium cintai Malaysia

BH - 21/9/2007

Walter François berkunjung lebih 40 kali, tulis dua buku mengenai negara ini



Daripada Wan A Hulaimi

BRUSSELS: Walter François, 60, bukan saja sudah berkunjung ke Malaysia lebih 40 kali sejak 1979, malah beliau berjaya menghasilkan dua buku mengenai negara yang disifatkannya sebagai destinasi kegemarannya itu serta berazam menulis satu lagi dalam tempoh terdekat.

"Saya jatuh cinta dengan Malaysia," katanya dalam Bahasa Malaysia yang fasih, ketika ditemui pada majlis sambutan ulang tahun kemerdekaan Malaysia ke-50 di sini, baru-baru ini.

Bagaimanapun, lebih mengagumkan ialah apabila beliau tidak pernah belajar bahasa itu secara formal sebaliknya dibuat atas inisiatif sendiri serta pergaulan seharian.

"Saya belajar sendiri Bahasa Malaysia lebih kurang enam tahun lalu," katanya sambil memberi pujian kepada sebuah buku yang dibelinya di sebuah kedai di KLCC yang menjamin penguasaan Bahasa Malaysia dalam masa 365 hari.


François pernah memberi taklimat kepada pihak yang berminat di Belgium mengenai ekonomi negara Asia Tenggara dan sekali sekala dia membuat lawatan ke Hong Kong, Indonesia, Singapura, Thailand dan Malaysia untuk bercuti dan untuk membuat penyelidikannya.

"Selama 30 tahun saya bekerja dengan General Bank yang sekarang menukar namanya kepada Forties, dan sekarang saya pula mencebur ke bidang yang baru sama sekali untuk saya," katanya. Buku pertamanya berjudul *Malaysia* ditulis dengan hiasan gambar oleh Yvan Deweerdt.

Dengan kepuasan daripada kejayaannya dalam bidang penulisan itu, François bertekad mahu menulis sebuah buku lagi.

Hasilnya ialah sebuah buku berjudul *Langkawi, Pulau Yang Penuh Lagenda Misteri* ditulis dan dihiasi dengan gambar oleh beliau.

"Projek saya seterusnya ialah satu buku laporan bergambar mengenai negeri Selangor," katanya.



CINTAI MALAYSIA: Walter Francois bersama dua naskhah buku yang ditulisnya mengenai Malaysia.